

«En attendant Godot»

Dals 18 d'october als 9 da december

DA GUIJU SOBIELA-CAANITZ

■ **Las elecziuns federalas dals 18 d'october pon ins cumparegliar cun in tsunami. En il cussegl nazional survegn la pps 65 mandats empè da «mo» 54 il 2011, pia 29,4% da las vuschs empè da 26,6%, ils verd-liberals percenter mo pli set mandats e 4,6% empè da 12 mandats e 5,4%.**

La pps gudogna mandats e vuschs en mintga chantun, ils verd-liberals perdan vuschs en mintga chantun, danor NE, SZ e TI, nua ch'i na candidavan betg il 2011, e JU, SH e VS, nua ch'i n'han mai candidà. Pli ras personalitads da vart sanestra en il cussegl dals chantuns ston spetgar il segund scrutini per savoir sche lur mandat vegnia renovà: *Robert Cramer* (GE), *Christian Levrat* (FR), *Liliane Maury Pasquier* (GE), *Paul Rechsteiner* (SG), *Luc Recordon* (VD), *Géraldine Savary* (VD) e *Hans Stöckli* (BE). Pir lur enconusch'ins la cumposiziun da l'assemblea federala. «Le Courrier» (Genevra) e «La Liberté» (Friburg) dals 26 d'october fan du-

mondas: Tgi vegn schef da la grupp parlamentara socialdemocratica per remplazzar *Andy Tschümperlin* (SZ)? Nagina resposta. Tgi vegn president da la pcd suenter cuss. naz. *Christophe Darbellay* che n'ha betg pli candidà? Qua respunda l'artitgel: «Il candidat ideal è cuss. naz. *Martin Candinas* (35 onns), la staila ascendenta da la pcd.»

Resguardar las regiuns linguisticas

Deplorablament è in'otra staila grischuna gist sa stizzada en il firmament politic svizzer. Cuss. fed. *Evelyne Widmer-Schlumpf* ha declerà ils 28 d'october ch'ella na veglia pli candidar. Ella merita noss respect e noss engraziament. Sia sedia vegn pia libra. La prima partida svizra, la pps, ha declerà immediat ch'ella pretendia lezza sedia. Sch'ella numna in candidat u ina candidata, sto l'assemblea federala decider en chausa ils 9 da december. La Constituziun federala di: «Ils commembers dal cussegl federal vegnan elegids da l'assemblea federala (...). Latiers so vegnin procurà che las regiuns dal

pajais e las regiuns linguisticas vegnian respresentadas adequatament» (art. 175). La ps e la pld han gia mingina dus commembers en il cussegl federal, numnadament ina personalitad germanofona, *Simonetta Sommaruga* u *Johann Schneider-Ammann*, ed in Romand, *Alain Berset* u *Didier Burkhalter*. La pps ha gia in cuss. fed. aleman: *Ueli Maurer*. Sch'ella pretenda propi ina segunda sedia, fissi pia «adequat» da preschentar ina candidatura latina. Dapi la demisiun da cuss. fed. *Flavio Cotti* il 1998, avant deschet onns, na datti pli nagin cuss. fed. italofon, e quai en in temp nua che la Svizra sto adina puspè tractar cun noss grond pajais cunfinant a sid da Ponte Tresa. La pps pudess preschentar in Tessinais per succeder a *Widmer-Schlumpf*: Il medi pschiater *Marco Chiesa* (*1977), domicilià a Ruvigliana/TI, «visiting professor at University College London», fiss l'emprim cuss. fed. italofon dal 21avel tschientaner; el pudess negoziar cun Londra e cun Roma senza interpret.